

10.12.1961

A ricordo dell'esimio Redeo oggi Frà Vittore

Ascultì sta poesia
nenc sl'è tót una busìa
l'è stè fata per l'onore
del presente Frà Vittore.

Quant che lò l'era tra num
"Deo" à i géma ad soranóm
cl'era pò e fiól d' Mucrégna
ch'e staseva int'una végna

Par stè pò a cà d' Sisòn
bsògna cnós quel cl'è e sapòn
che pò tè st'a'ne druvisa
ad magnè un'ci'un scuriva.

Quand ch'e vùs dvantè piò fén
e smitet da cuntadén
e ciapet sega e martèl
c'ut rusghèva nénca un vdèl

Quand che pò Dino e ragnèva
lò chisà s'ui abadèva
ma pò dòp u's arpantiva
ui pansèva e l'ubbidiva.

Par andè sòta Sintòn
e laset e prem padròn
l'andet sò che becamórt
par pruvè al cascì da mórt .

Lò cun Franco intla sezìon
u'ì'à armes nénca e cudròn
par e bèn di su aspirint
ui cascò nénca du dint

Ècco Deo e fiól 'd Sisòn
ch'e ratapla la sezìon
quatar ciud e un bòn martèl
ut piéntèva cumè un pèl

Quant ui'era un quèl da fè
guai se l'eva da manchè
cun al brazi e cun i pià
e faseva par zénq-sia.

Quant e vùs e carnevèl
alè sei cl'avnét e bèl
cun e tandem lò l'andèva
E la zénta la's' impacèva.

Tót d'un cólp e mét giudizi
e smitet tót quant i vizi
cióu burdél sa saral stè
vut avdei c'us vó fè frè?

L'era stè cun al Misiòn
cl'era avnù la decisiòn
da e padre lò l'andèva
e da spèsa i ciacarèva

Quand che pò l'andét a cà
ui'e get cun e su bà
e la zénta ch'il saveva
tót d'un cólp i ni cardeva

Però lò us'inviét d'insò
e d'indria un avnet piò
du èn fa quand l'andet via
e ruget nènc la Maria

E la zénta i geva tót
cl'era stè par fè un bèl tróc
mo adès iè stè cuntint
che ad tróc un'gn'è stè gnint.

A Redeo che se ne và
un augurio bèn ui stà
tanto bene fin cl'è ad 'qua
e addlà l'eternità.

Tót cla roba che avém det
un'è stè par fè un dispèt
ma par tnei in allegria
tót sta bèla cumpagnia.

11.12.2011

Dopo 50 anni !

Ascultì sta poesia
nénc sl'è tót una busìa
l'è stè fata per l'onore
del presente Frà Vittore.

Adès l'è acvè tra nùm
e Frà Vittore l'è e su nóm
c'l'è pò sèmpra e fiól d'Mucrégna
cvi c'staseva alà int' la végna.

Par stè pò a cà d'Sisòn
bsògna cnós cvél cl'è e butòn
che camion grand cun'al budèli
c'sócìa sò bród e garnèli.

Cvant ch'e vùs dvantè piò fén
e smitet da cuntadén
u's mitét la caparèla
lèrga e lónga féna a tèra.

Adès e Priór ogni tént e ragna
par cvel che fa, póc e guadagna
lò e cuntenua e un's' pantes
nénc s'lè e cuntrèri. u'l fa l'istès.

E lascet Ciséna tót cuntént..
par andè int'un ent cunvént.
Par truvè dagl'ucasiòn
il faset Frè, zercantòn.

Lò e Angelo ultimamént
l'à mess e dièval inte cunvént
in dis miga agl'uraziòn
i fa sól dla cunfusiòn.

Ècco Vittore e fiól d'Sisòn
che ratàpla e vèc purtòn
cvatar ciùd e un bòn martèl
e cunvént l'è za piò bèl

Parchè se uiè un cvèl da fè
guai a lò sl'à da manchè
cun al brazi e cun i pìa
e fa sèmpra par zéncv-sia.

Cvånd ch'e vén da e su fradèl
alè sei che vén e bèl
l'è un pèz che ui stà drià
che e vreb purtèsal via

Bsògna dì'j'al cun e Grand
adèss ó dmén a ne sò quand
cun Daniele e sparirà
"ciapa ciapa e porta a cà",

Tót d'un cólp i'j'vó fè fèsta
s'èl i Sisùn i'à pers la tèsta?
ciú burdél al savi e parchè?
L'è zincvént'èn c'u's'è fat frè!

L'è stè cun al misiòn
che l'à ciapè la decisiòn
nò avisènd nisun parént
u's'è ciùs inte cunvént

E fasét savei a e bà
che un turnèva piò a cà
"a stag bén intla mi zlèta
vin pù a tò la biciclèta".

Frà Vittore e tórna a Fèna
sicuramént num a farém scéna
dop a zincvént'èn che l'è andè via
un rógia piò gnénc la Maria!

Vuìt zènta a dirì tót
grèzia-grèzia di biscót.
e un piàt d'turtlin par fès cuntint?
"nò andé pù, cun'gnè piò gnint".

Per Frà Vittore che oggi è cvà
un grazie a Dio bén ci stà
Che e Signór sèmpra ul sustégna
par fè de bén intla su végna.

Tót clà roba che avem det
un è stè par fè un dispèt
ma par tnei in allegria
tót sta béla cumpagnia.